



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

South Carolina nung Trump-i ayong-ayonga Haley akok

Jordan Thompson-i Los Cabos Open kokogo



VOL. XXI ISSUE NO. 134 (ADOK 134) DIMAPUR TENTONÜ (MONDAY) TSÜKLAI (FEBRUARY) 26, 2024 ₹ 5.00

AMSU office amakba aitsür: NESO

Imphal, February 25, 2024 (Agencies): February 23 nü Thangmeiband kübok DM College nung aliba All Manipur Students' Union (AMSU) office kima nung bomb ka pokdaksüba sülen anogo ka lir UCM office rongdokja liasü.

AMSU office nung bomb apokdang arishi küm 24 tain Oinam Kenegy poksetba den kaketshir ka yirua lir.

North East Students' Organisation (NESO)-i Deobarnü AMSU office kima nung bomb pokdaksüba aitsüogo. "February 23, 2024 aonung 9:30 ako meta AMSU office kima nung bomb pokdaksüba SM College nung kaketshir Oinam Kenegy asüba aser ano kaketshir Salam Michael yiruba atema temulung raksar aser iba inyakyim aitsür" ta NESO-i sangdong ka nung metetdaksü.

Macha Leima School dena UCM ama loktitentet tulu ka indang office rongdoksüba, tang telok office tem raksatsüba aser talisa NESO Advisor Sinam Prakash'er ki raksatsüba atema tebilemsü abener ta parnokhi ashi.

Iba ama tensa ka nung public- i AMSU ya non-political organisation ka ama len anitsü aser lidaktsüsüla. Item tatalokba ajanga kaketshirtem aser public ratadaksür aser tetsübu aitdaksür. Manipur nung tensa süngjemtsü ayongzüker aser sorkar dang tensa azüoktsü mepishir, ta NESO-isa metetdaksü.

Sorkari yimjung maparen maneni inyaktsüla aser kasa mapang tanga teloktem den

yimten telatet ka alitsü atema olemteptsüla, ta parnokhi ashi. Yaküm Manipur tensa kanga mejungi akümdang NESO-i peace mission ka tenzüka liasü aser maneni iba peace mission inyaktsü, ta NESO-isa metetdaksü.

NESO nung Khasi Students' Union (KSU), All Assam Students' Union (AASU), Naga Students' Federation (NSF), Mizo Zirlai Pawl (MZP), Twipra Students' Federation (TSF), All Manipur Students' Union (AMSU), Garo Students' Union (GSU) aser All Arunachal Pradesh Students' Union (AAPSU) dena lir.

AMSU office nung bomb pokdaksüba sülen February 24, 2024 anepdang nisung telok kati Imphal West district nung United Committee Manipur (UCM) office rongdoksü aser iba ajanga tensa mejungi aküm.

February 24 anepdang züngia mejangjatetba nisung kari UCM office rongdoksü. Iba office ya Imphal West district kübok Meitei nungter teimba ser aliba Lamphelpat tesem nung lir.

Manipur nung osangbenrtemi lungkak aiter:

Imphal nung osangbener ka dak teka sangshiba anema Manipur nung aliba media house ajaki tanü nungi osangtsüsang madoker.

February 23 ayaterm nung Kumar Nongthombam ta ser local TV channel reporter dak teka sangshiba aser pur aoba aitsür ta All Manipur Working Journalists' Union (AMWJU) aser Editors' Guild Manipur (EGM)-i metetdaksüogo.

Manipur nung UCC benoktsü tebilemba mali: CM Biren Singh

Imphal, February 25, 2024 (Agencies): Manipur nung tesüiba ita asem-pezü ka lendong mataloki arur ta Chief Minister N Biren Singh-i Deobarnü ashi.

Manipur nung ozüng alema inyaksangshir kar ajanga law & order timtem ajurua liasü. State sorkar aser talisa home ministry-i tenük yokdar aser tensa azüoktsü atema inyaktsü, ta pai ashi.

Osangbenrtemi Manipur nung Uniform Civil Code (UCC) benoktsü indang asüngdangdang "state sorkari tang tashi nung UCC benoktsü tebilemba kecha mali" ta CM Biren-i langzü.

Sorkari olemtep ajanga yimjung bener arutsü tenangzüka agia inyaker anungji

nübertemi sorkar maparen dak temulung alemtsü mepishir, ta pai ashi.

"Nisung ajak yimjung nung alitsü asoshi timten telatet ka bener arutsüla aser iba atema olemtep tenzüko" ta CM Biren-isa ashi.

"Nütsüng yongsük lakh 30 nungi lakh 1.5 shi ka drug amshirtem lir. Iba ajanga state sorkari 2018 küm war on drugs sangoktsü" ta pai ashi.

"2006 nungi 2018 tsüngda Manipur nung yimtsüng 1,400 shi tasen aküm aser iba ajanga timtem bentsür aru" ta Biren-isa shisem.

State sorkari 1961 base year nung ajemdaker ozüng alema arurtem jangjatsü ta paisa ashi.

India nung Cable-Stayed Bridge talangtiba den AIIMS 5 lapok



February 25, 2024 nü Gujarat kübok Dwarka nung PM Narendra Modi-i 'Sudarshan Setu' lapoktsüba angur.

New Delhi, February 25, 2024 (Agencies): Prime Minister Narendra Modi-i Deobarnü India nung cable-stayed bridge talangtiba lapoktsüogo aser iba apu dang 'Sudarshan Setu' ta ajar.

Gujarat kübok Dwarka nung 'Sudarshan Setu' ajanga Okha aser Beyt Dwarka asetkong sendakteper. Iba apu ya Rs 979 crore endoka yangluogo.

PM Modi-i October 2017 nung kilometre 2.3 talang apu yanglutsü atema lung azüngja liasü aser tanü pai iba apu lapoktsüogo.

"27.20 metre tulu apu nung 2.50 metre tulu tetsüng lenmang lir" ta sorkar ketdangsür kati ashi.

Iba apu dang 'Signature Bridge' ta ajar saka 'Sudarshan Setu' (Sudarshan Bridge) ta melenogo. Beyt Dwarka ya Okha port anasa asetkong ka lir aser

iba ya Dwarka jila nung kilometre 30 shi pilar lir.

"Tanü Sudarshan Setu lapoktsüba atema kanga pelar. Iba apu ajanga ali aser nisungtem sendakteper. Iba ajanga onoki terenlok aser tejakleni aotsü nangzüka kuli agütsür" ta Prime Minister Modi-i tanü metetdaksü.

Tanü pai apu melapokdang Dwarkadhish temple nung sarasadem.

Prime Minister Modi-isa Deobarnü Gujarat nung mezüngbuba All India Institute of Medical Sciences (AIIMS) lapoktsüogo.

AIIMS Rajkot lapokba sentong nung Union Minister of Health and Family Welfare Mansukh Mandaviya aser Bhupendrabhai Patel na aden.

"Tanü asenoki Rajkot tera

angur aser iba ajanga India renlokba nung health facilities jenjang tajungba akümba angur. Nüjiso ngur küm 50 tashi linük nung AIIMS ka dang liasü aser ibajia Delhi nung dang liasü. Nüjiso ngur küm 70 tashi süia arudang AIIMS 7 dang agizük saka item mapatongtem tembanga meinyaktet" ta PM Modi-i ashi.

Tanü Modi-i Rajkot (Gujarat), Bathinda (Punjab), Raebareli (Uttar Pradesh), Kalyani (West Bengal) aser Mangalagiri (Andhra Pradesh) nung AIIMS pungu lapoktsü.

PM Modi-i December 2020 nung video conferencing ajanga AIIMS Rajkot yanglutsü atema lung azüngja liasü.

Rajkot AIIMS ya ali acre 201 nung yanglua lir aser world-class hospital ka lir. Iba mozü kidang ICU aser super-speciality beds dena yipden 720 lir.

Tanü PM Modi-i operation theatres 23, 30-bed AYUSH block aser IPD 250 beds lapoktsü, ta Gujarat Health Minister Rushikesh Patel-i ashi.

Rajkot AIIMS ya Rs 1,195 crore endoka yanglu aser tang tashi nung OPD ajanga shiranger 1.44 lakh yariogo.

February 25, 2024 nü PM Modi-isa Rs 48,000 crore endoka yanglutsü mapatongtem tenzüksüogo. Item mapatong ya NHAI, Railways, Energy and Petrochemicals, Road and Building, Ports aser Health and Family Welfare ama state aser Central departments indang lir.

Chennai nungi apusoba train Dimapur Station nung anentsü mepishir



Dimapur, February 25, 2024 (TYO): Chennai nungi apusoba aoba train service Dimapur Railway Station nung anentsü atema Tamil Nadu Governor R.N. Ravi dangi shidi ka züluogo.

Iba shidi ya North East India Welfare Association Chennai (NEIWAC) President aser Naga Christian Fellowship Chennai (NCF Chennai) Pastor Wapangtoshi-i zülu aser pai Raj

Bhavan Chennai nung Governor Ravi nem agütsü.

COVID-19 wara matongdang Chennai nungi apusoba aoba train ka Dimapur Railway Station nung anen aser iba ajanga Northeast India nung alirtem aser talisa Nagaland, Manipur aser alirtemi tajangzüku ngua liasü ta Pastor Wapangtoshi-i shidi nung shia lir.

Iba train service anenba

ajanga pei pei kidangi aoertem aser Chennai-i nüngdak balalai arurtemi timtem ajurur. Iba ajanga mapang endoker aser senotsü talila agütsüsüsa akümer ta paisa ashi.

Iba train service tenzüka ajanga Northeast nung alirtem ajangzüka dang masü saka Tamil Nadu aser Northeast nung alir tsüngda tesentaktep akangshitsü, ta Wapangtoshi-isa metetdaksüogo.

CANSSEA Dimapur Unit ketdangpur tasen shimogo



CANSSEA Dimapur Unit ketdangpur menden nungi alurtem aser tasen shimba ketdangpurtem February 23, 2024 nü lokti senden amendang tangokba noksa ka yangi angur.

Dimapur, Tsüklai/February 25 (TYO): Confederation of All Nagaland State Service Employees Association (CANSSEA) Dimapur Unit lokti senden February 23, 2024 nü Directorate of Land Resources and Survey, Dimapur nung mena liasü.

CANSSEA Dimapur Unit tir tasenba, I Anungba Sanglir-i iba sentong nung o

tatsüka jembidang Central Unit nungi yariteptsü ayongzük aser Dimapur nung kisüng masü saka Chümoukedima aser Niuland nunga asendenshia Unit tarutsü jenjang tajungba akumtsü asoshi ka kuma lungjemtsü aser sorkar mapa inyaker ajangzüktsü atema inyaksü ayongzuka liasü.

CANSSEA Dimapur Unit

nung ketdangpur tasen shimer yamai alitsü: Tir I Anungba Sanglir, Joint Director, Food & Civil Supplies, tatong tir Bokaro Sema, Range Officer, Forest, tongti zülur Lolano Patton, DPRO, DIPR aser joint secretary Thomas Wilson, Asst Commissioner, Taxes alitsü aser kimen Tovito Sema, Superintendent, DGM alitsü.

Congress-Tipra Motha tetsübotsü mali: Tripura BJP

Agartala, Tsüklai/February 25 (Agencies): Tawa Congress aser Tipra Motha tsüngta jembishinü akaba ajanga state politics matsüshitsü mesüra BJP atema tayongzükba mali, ta Tripura Pradesh BJP tir Rajib Bhattacharya-i Deobarnü ashi.

Tripura Congress lenirtem aser Tripura nung opposition party Tipra Motha tsüngta senden ka amen aser Ato Kilonser Modi indang Mann Ki Baat sülen Bhattacharya-i osangbener den jembia liasü.

Parnok jembishinüba indang

osangtsüsang balala nungi angazükogo saka BJP asoshi parnok tayongzükba balaka mali ta pai ashi.

"BJP teti renema lir. Asen Ato Kilonser Narendra Modi-i nübur ajungtsü aser terenlok atema anibelem mesasai mapa meranga inyaker. Chief Minister Prof. Dr. Manik Saha lenisüba kübok double-engine sorkar ya nübur tenzüktsü temulungtetba nung lir," ta Bhattacharya-i ashi.

Chief Minister-i tawa health insurance scheme ka tenzükja

sensu ajunga nem medical teyari sen lakh pongu tashi agütsüba amala inyakyim indang pai lemsatepa liasü.

Tawa elections nung tayongzükba ajangshiaka Tripura BJP tekolakbai par party renema aliba indang nenshia ashi aser nüburtemi maneni yariba atema pelaba lemsatepa liasü.

BJP telungzük nung Tipra Motha den tang jembishinü tesüdak aliba indang asüngdangba mapang, iba osang lenir tejentem nungi angutsü ta ashi.

Punglwa nung Livestock Infertility Awareness cum Treatment Camp ali



Dimapur, Tsüklai/February 25 (TYO): College of Veterinary Sciences and Animal Husbandry, CAU (I), Jalukie ajanga Punglwa-A yimdak Council Hall nung February 24, 2024 nü "Livestock Infertility Awareness cum Treatment Camp" sentong ayongzuka liasü.

Iba sentong ya Dr. Tukheswar Chutia, Assistant Professor, Department of Veterinary Gynaecology and Obstetrics lenisüba kübok takotet tesayurtem aser kaketshirtemi agia liasü aser Dr. I. Shakuntala, Dean of the Veterinary College, Jalukie, Nagaland ajanga ketdang asü.

Iba sentong ya NEH-Component kübok ICAR-National Research Centre on Equines, Hissar, Haryana ajanga senotsü teyari agüja ayongzük.

Sentong nung Dr. Tukheswar Chutia menden liasü aser Dr. A. Palanisammi, Professor, Department of Veterinary Gynaecology and Obstetrics ajanga aluyimer tem pela agizükba o jembia aser iba sentong nung kanga junga shilem agia shisatsü angutsü aser tajangzük agitsü ayongzuka liasü.

Iba sentong nung shilem ka ama technical session ka agi, kong kiset shiruru techanu mongutetba aser tashidak balala indang onüktem nung ajemdaker shisalen sayurtemi jembia aser iba sülen farmer-scientist sensaksemba agia liasü.

Iba sentong nung Dr. Tukheswar Chutia; Dr. Sonjoy Kr. Borthakur, Professor; Dr. Neithono Kuotsu, Assistant Professor aser Dr. Raghubir

Singh, Assistant Professor nunger temi "Infertility issues in livestock, its impact and management", "Parasitic diseases affecting animal reproduction and its management", "Common animal diseases in Nagaland, Prevention & Treatment" aser "Zoonotic diseases of public health importance" onüktem jembia liasü.

Sentong nungsa shiruru temang reprangba, anepaluba aser mozü agütsüba maparen angati agia liasü.

Iba sentong nung aluyimer 44 aser ketdangsur 14 dena liasü. Iba camp nung nashi, ak aser azü amala kiset shiruru temang anepalua liasü. Sentong tatemi nashi 38, jang 47, ak 133, azü 26, tanü 36 aser an 300 atema aluyimer nem mozü balala lema agütsü.

DIPR ajanga Metongshitsür

Dimapur, Tsüklai/February 25 (TYO): Kohima nung enforcement agency balala den shisadokden senden ka amen ta February 23, 2024 nü sangdongba ya, Deputy Commissioner, Kohima indang Conference Hall nung February 23, 2024 nü Deputy Commissioner & DEO Kohima district, Kumar Ramnikant lenisüba kübok ozüng amshirtem den shisadokden senden ka mena election tetsübo kecha makai ochishia aser shidak agitetsü

asoshi mera balala agitsü indang jembia ta metongshitsür, ta ketdangsur sangdong ka ajanga ashi.

Yi aser senotsü aitba mita reprangtsü asoshi SST, Flying Squad, Excise department temi inyakba tashi itshitsü aser aibelen mesüi osang shidak agütsüba indang iba senden nung jembia liasü.

Tamalen agütsüba sangdong tem 'null and void' ama züngshitsüla. Timtem ajangshiba atema sasa bilemer, ta sangdong ajanga ashi.

Manipur: Churachandpur FCI Godown nung security akangshir



Churachandpur kübok Tualnuam nung aliba FCI kima Assam Rifles temi camp amenokba noksa nung angur.

Imphal, Tsüklai/February 25 (Agencies): Manipur kübok Churachandpur district nung aliba Food Corporation of India (FCI) nung tenük yoker longkak aittsü ta olulu prokshiba ajanga ketdangsurtemi yangji security akangshia liasü.

aliba FCI godown nungya jang 500 MT riziünga yuteter.

Ajisüaka Kuki Zo kin timba süir iba tesem nung alirtemibo olulu prokshiba ama masütsü ta ashi.

"Shibai iba ama tamachi mapa inyaksü? Ibaji ajanga timtem ang tali akumtsü. FCI godown rongdoktsüba ajanga chiyongtsü agi tali ang antüngtsü," ta yangji alir kati ashi.

Item olulu prokshiba sülen Assam Rifles temi Churachandpur kübok Tualnuam nung aliba FCI campus nung camp ka amenoka liasü.

FCI godown anüktsü asoshi 35 Assam Rifles nungi sepaitem yangji amenoka lir ta ashir.

Tensa tamajungba akumba mechi FCI ketdangsurtemi iba godown nung ayutsü jang yokba maparen anena lir.

"FCI ajanga hopta ka dak tema iba godown-i jang meyoker. Anungji jang yua aliba shilem 50 shi agi ajemogo," ta FCI ketdangsur kati pa tenüng miimshia ashi. Tualnuam nung

February 15 nü Churachandpur SP office amaktsü merangba mapang nisung asem takum sama aser 30 dak tema yirua iba region nung tensa tamajungba akum.

Telungpur tem den külemi senzüa aliba video ka mechi police constable ka mapa nungi anentsba sülen mepetmesü adok.

Nisung 300 nungi 400 tsüngta adenshia SP office telungi aittsü merang aser long agi aon tenzük, ta Manipur police-i ashir.

Diphu nung nok-nüden nisung asem apu



Guwahati, Tsüklai/February 25 (Agencies): Assam Police aser CRPF personnel temi Assam nung Karbi Anglong district kübok Diphu nung prangbong aser injang nguteta liasü.

aser Kumud alias Rothai Phonglo puogo.

Pua alirtem nungi osang anguba aser parnoki nangzükba nung ajemdaker Dhansiri Police-i anir operation ka agiba nung teka agi yangluba pistol ka ngutet.

Parnoki AK-47 assault rifle ka, 0.32 mm pistol asem, magazine den injang aser hand grenade tem pua liasü.

Item hadir ngutetba dak sendakba nung Nijesh Langthasa, Manik Haflongbar,

Osang tali bendentsü aser item hadir ya kolen nungi aru aser kechi atema bener aru, itemji jangjatsü atema police temi par asem den asüngdangyaba mapang lir.



February 25, 2024 nü Gujarat kübok Dwarka nung Sudarshan Setu apu semzüksüba sülen Ato kilonser Narendra Modi, Gujarat Chief Minister Bhupendra Patel aser Gujarat BJP Tir CR Patil nunger tangokba noksa nung angur. Sudarshan Setu ya India nung cable mesanga yangluba apu talangtiba lir. Iba apu ajanga Okha mainland aser Beyt Dwarka asetkong sendakteptsür.

Temesepba mozü ajanga loktiliba aser linük yirutsür: PM Modi

New Delhi, Tsüklai/February 25 (Agencies): Amongnü Ato kilonser Narendra Modi-i, temesepba mozü nungi lanurtem kümzüksü nüngdak aser tashitait kibongtemi iba tebilemtsü anema raratsüla, ta ayongzük. 'Gayatri Parivar'-i ayongzükba 'Ashwamedha Yagya' sentong nung video ajanga jembidang Ato kilonser Modi-i, "Temesepba mozü machiba India yangertsü atema reju ka ama kibongtem tashi aittsü kanga tongtibang," ta ashi. "Reju ka ama kibong ka koma tashi meitlir yamaji kibong akhümket makai akümer, aser ibaji ajanga lenla ajak kongshir. Kibong ka nung züngsemtem anogo aika majurura mesüra külemi mener sensak masemra iba nungjagi timtem tenzüker. Anungji temesepba mozü mamshiba linük ka akümtsü

atema kibongtem tashi aritsüla," ta ashi. 'Ashwamedha Yagya' ya loktiliba campaign ka kümogo aser iba ya ajanga lanur million aika temesepba mozü nungi aienshidaktsür aser linük yangerba nung shilem agidaktsür, ta pai ashi. "Temesepba mozü achiba ya ajanga takümtem samadaktsür aser iba ya ajanga loktiliba aser linük yirutsür," ta paisa metetdaktsü. "Tarutsüji lanurtem meyong lir aser India tia yangluba den linük terenlok nung lanurtemi tongtibang shilem agir," ta pai ashi. 'Gayatri Parivar'-i inyakba mapatem aser tesayubatem atema tenüngsang agüja Modi-i, "Temesepba mozü nungi lanurtem kümzüksüla aser temesepba mozü agi kongshia aliba lanurtem nungita

ya aritsüla," ta ashi. Linük aser international campaigns nung lanurtem nem shilem agidaktsüba ajanga lanurtem temesepba mozü nungi jenbudaktsütsü; linük terenlok aser tangar dak memetaloki aliba India yangertsü nükjidong ataloktsü atema lanurtemi agitsü tongtibang shilem lir, ta pai ashi. Fit India Movement aser Khelo India ama mapatongtem ajanga lanurtem ajungshitsü; mazüngi aliba lanur kati temesepba mozü nung mekongshitsü, ta pai ashi. Organisation tasen- 'Mera Yuva Bharat (MY Bharat)' dak sendakba nung pai, iba portal nung lanur crore 1.5-i register süogo, koba ajanga linük yangerba nung lanurtem tashi amshitsü atema temeden agütsür, ta metetdaktsü.

Aluyimertemi akhangba mataloktsü tashi longkak aittsü: Sarwan Pandher

New Delhi, February 25 (Agencies): Punjab-Haryana arrtsülen aluyimer meyirjang aikati maneni longkak aitba mapang Amongnü aluyimertem lenir, Sarwan Singh Pandher-i, aluyimertemi akhangba onüktem sorkari mataloktsü tashi aluyimertemi maneni longkak aittsü, ta metetdaktsü. Sorkar ketdangsertemi Delhi aser Haryana na tsüngda Singhu aser Tikri arrtsü tera lapoktsüogo aser Haryana kübok district tenet- Kaithal, Kurukshetra, Ambala, Sirsa,

Fatehabad, Jind aser Hisar nung internet services lapoktsüogo. Sarwan Singh Pandher-i, "Onoki Ato kilonser Modi dang aluyimertem dak tatalokba balala indang jembitsü asoshi mepishir," ta metetdaktsü. Tawa longkak aitdang khasetba aluyimer, Shubhakaran nem akhüm agüja Honibar aonung aluyimertemi Punjab aser Haryana arrtsülen Shambhu aser Khanauri nung candle march agia liasü. Punjab sorkari aluyimer ka khasetertem anema FIR

benoktsü tetuyuba magütsü tashi tasümgangi merongdoktsü, ta aluyimertemi metetdakja lir. Ano külen tanga osang ka nung, Amongnü Union Agriculture Minister Arjun Munda-i, sorkari aluyimertem den ken o jembitsü melunga dang lir; aluyimba sector terenlok atema India sorkari nendaka inyaker, ta metetdaktsü. Lok Sabha election atema model code of conduct (MCC) benokyonga aluyimertemi maneni longkak aittsü, ta sangdonga lir.



February 25, 2024 nü Patiala district kübok Punjab-Haryana Shambhu arrtsü anasa aluyimertem aser parnok kibong züngsemtemi longak aitdang tangokba noksa nung angur.

Chhattisgarh nung sepaitemi Maoists telungpur asem khaset

Raipur, February 25 (Agencies): Chhattisgarh state kübok Kanker district nung security sepaitem aser Maoists telungpur tsüngda raradang telungpur asem khasetogo, ta Amongnü police-i metetdaktsü. Kanker Superintendent of Police, Indira Kalyan Elesela-i, "District Reserve Guard aser Border Security Force na senteper Maoists telungpurtem mita aoba mapang Koyalibeda area nung aliba arem nung parnok ajurutepa khatep. Tang tashi nung telungpur asem tasümgang den külemi prangpong ana ngutetogo aser maneni telungpurtem mita odar," ta metetdaktsü. Hokolbarnü Union Home Minister Amit Shah-i, Narendra Modi-i aniba sorkari terenlok

mapa inyakba den külemi security agütsüba ajanga Maoists telungpurtem kanga takoksa ngudar; joko Maoists telungpurtem ajak samatsüsa mapang ka nung lir, ta metetdakja liasü. Ministry of Home Affairs (MHA)-i ashiba agi, 2014 küm nungi tenzüka tesüiba küm 10 tsüngda Maoists telungpur dak sendakba rara aser nisung asüba kanga ajema kümogo. MHA-i ashiba agi, 2004 küm nungi 2014 küm tashi nung Maoists telungpur dak sendakba tatalokba 7,679 liasü aser nisung 6,984 asü; iba denji medemdangra 2014 küm nungi 2023 küm June 15 tashi nung Maoists dak sendakba tatalokba 7,649 liasü aser nisung 2,020 dang asü.

India densema linük 5-i arem shiruru shibelenba anema inyaktsü



New Delhi nung Regional Investigative & Analytical Case Meeting (RIACM) on Exotic Species Trafficking senden nung CBI Director, Praveen Sood-i jembidang tangokba noksa nung angur.

New Delhi, February 25 (Agencies): India, Bangladesh, Thailand, Malaysia aser Indonesia linüktemi longjemer arem shiruru shibelenba anema amalitepa inyaktsü bangjemogo. Linük pongui parnok tsüngda intelligence osang lemsateptsü aser arem shiruru shibelenertem rongsen lenmang shibangtsütsü, ta ketdangsertemi metetdaktsü. Tawa New Delhi nung CBI aser Interpol-i ayongzükba Regional Investigative & Analytical Case Meeting (RIACM) on Exotic Species Trafficking senden nung ozümg aleva arem shiruru shibelenertemi amshiba kanga tongtibang lenmang pezü mongintemi lemsatepa liasü. Ozümg aleva arem shiruru tapu balala shibelenertemi talisa tayimtsü ajanga Africa nungi Southeast Asia tashi belener, iba sülen India aser China-i bener arur, ta ketdangsertemi ashi. Mongintemi ashiba agi, ozümg aleva arem shirurtemji lenmang pezü ajanga shibelenertem- Africa nungi Southeast Asia tashi aser Bangladesh tashi tayimtsü ajanga bener arur; Malaysia aser Indonesia nungi Thailand aser Myanmar arrtsü ajanga China-i bener arur; Malaysia nungi per, hano aser 'iguanas'

sangkan Thailand-i bener aoba sülen tayimtsü ajanga India tashi bener arur, aser Thailand nungi Myanmar den arrtsü ajanga India-i bener arur. 2022 küm nunga India nung agency balalai ozümg aleva shibelenba shiruru 50 dak tema pua liasü; item shiruru rongnung 'Hoolock' shiongo, hano, sangken, 'Moor Macquaques' shiongo, aser 'ball python' ta ajaba per densema liasü. Arem shirurtemji kidang metsüba shiruru ama memesütsüla, kechiyong item shiruru dak aliba 'zoonotic viruses' ji nisung dak menazüka prokshitsüa akok, ta mongintemi ashir. India nungia iba senden nung adener Wildlife Crime Control Bureau, Directorate of Revenue Intelligence aser CBI ketdangsertemi, airport nung arem shirurtem maneni mita repringba ajanga arem shiruru balala India-i bener aruba tuluka aziüktetogo, ta metetdaktsü. Iba senden nung okila jembidang CBI Director, Praveen Sood-i, samatsüsa aliba arem shirurtem shibelenba ya amokmeren tuluka kümogo, anungji ozümg balala longjemer benokba, linüktemi longjemer inyakba aser nüburtemia shilem agiba ajanga item shiruru wazüka yutettsü, ta ayongzüka liasü.



TIR YIMYIM YIMOBILEM (EDITORIAL)

DIMAPUR TENTONÜ, FEBRUARY (TSÜKLAI) 26, 2024

Kodaser telok metsü-semeri nüchiso bushitsü ?

Taoba hopta, Tizit town nung NSCN-IM nung kilonser Khampei Opeiham pa kidang lia khasetba osang ya asenok ajak asoshi taoksatsüka aser shisabolutsüka lir. Angazükba agi, pa ya tamalenbo NSCN tanga telok nung liasü aser pa NSCN-IM nung dener küm ka ta majungdangyongi iba lendong ya ataloker asütsü. Atangji, pa ya shibai mesüra shirnoki kechi atema kasetar memetet aser tang tashi mejangjatetter, ajisüaka tangar bendanger tsükchiri masü saka asenok Naga nung linük tenzükertem rongnung meputep aliba agi atalok südi ta dang ajaki temulung melemi bilema alitsü südi. Ashiko, nisung asünungji paia tangar jashitsüsa inyaker alitsüa akok, saka tasür dang asüngdangtsüa masü aser tasüri langzüsüa masü, anungji Naga nung tarutsü nung putepa aotsü indang jembitsüba dak alaka tasür akoksar anentsüsa akümer. Ano, meimlaba mapang kanga tesasatsüka atalokbaji, Phek district kübok Kütsapo nung Forum for Naga Reconciliation (FNR) aser Naga Shisha Hoho nati Naga nung putepa alitsü atema ayongzükba sentong nung Naga nung linük tenzükertem, yimten, lokti aser arogotem nungi lenirtem adenshia Naga nung putepa alitsü asoshi Tsüngrem tenüng nung nangzükter senshiba sülen anogo ananübuba nung Tizit nung lendong atalokba ya asütsü. Ibai Naga nung linük tenzükter asoshi dang masü arogo aser FNR ama telok asoshi tatidang tuluka asütsü. Alima nung alir asünungji, linük tenzükba mapa nung yimten nüchiso asoshi rarar teloktem rongnung dang masü saka asenok nübertem rongnunga meputep aser jashitep adoktsü. Ajisüaka, meputepba agi mesüra tejashi mapang ajuru shia kati ka khasettep nungbo asen lima aser nübor agi mathitsü. Asenok Naga nung yimten nüchiso asoshi raraba maparen nung tangar bendanger tsükchir den raraba tongpang nung nokdang dang taküm senti taküm sama masü saka asenok yiar amai kümer asenok o asenok na tsüngda meputep adoka yimti yimdong nung dena khatapa azü tokshiba anogotem to bilemdangra, tanga aser tarutsü nunga kecha agia memenoktetsüsa tesama aser takoksa tulu ajuruogo ta sasasetta bilemer. Item yiar mapatem to agi tanü kibong aika temulung zürep tia nung lir. Atangji, Naga nung kibong aikati par tsürabur mesüra par tanur aser adianu khasetertem dang taidok agütsüogo aser ano aika taidoka magütsütet aser tamadoka mamadoktet mulung shirang tia nung lir. Itemji mapang agidang aneptsütsü. Iba ama tia nung ano Naga nung o Naga nung azütokshitepa khatap tenzükra, ajibo Naga yimten asoshi masü saka auer telok o auer telok na rarateper amai asütsü. Iba jagi Naga yimten nüchiso atema inyakba mapa nung timtem aser takoksa tulu bener arutsütsü. Koba lima aser koba teloka pei nübertem rongnung azü tokshitepa raraba ajanga pei lima yimten nüchiso anguba mali. Joko, Naga nungertema telok tilala metsü semer ka küma lemsar Naga yimten nüchiso indang jembitsü agibo item teloktem ajak longjemer India den jembu tajungba asütsü. Naga nung yimten nüchiso kodaser telok metsü semerkati bushitsü ? Aji alima tsüngdang temenünütsüka lir aser iba tia nungbo India-ia Naga nung akhümtsüba mamshitsü. Yimjung yanglur küm metsü semer jungaka, India-i Naga nung yimten temeten ken o tatem küma jembitsü rongdaka mebilemi akümba tebilemtsü aser taiji asenok dak keta lir. Asenokbo meputepsüa akok, saka Naga yimten tebilemtsü o ya tatem küma jembir telemtetba kati arutetsü atema, Naga nung telok telemsa ajak adeshir külemi sabang ka nung India ajurutsüla. Aji tasak masü, aji telok kati yimli ka agütsü nung ajak iba sülen anidaktsü aser ken o melamelaa tatembang kati arutsü. Joko, Naga yimten nüchiso bushirtema ojang timatemtsüsa telemsa masü telemtetba agir südaktsüner.

OLEMSABANG

Advisor-i mebilemdangi jembiba agi nübur mulong yirutsüogo

~ L.Kika Pongener.

Anogo ishika tejaklen, nübur madak yimsu asütsü meyongnem agüja shimtetba (Elected Member) kati, Naga nung kin o kin tsüngda nung bendanga beshiba olen kar jembiba agi, Sumi kin aser Ao kin nüburtem temulong kanga yirutsüogo. Talisa, lanur shirnok dak School nung tesayur asütsü sempet keta lir, shirnok School nung tesayur asütsü tejangraba, nukjidong aser mangdang (Vision) tulu lir, aser Education nung Graduate, Post Graduate aser Doctorate tashi ngua zünger (Qualified) lir, item lanurtem aika temulong kanga yirutsüogo aser parnok mangdang (Vision) remseptsüogo. Lennir Dr. Kekhrielhoulie Yhome, Advisor School Education & SCERT, pai aruya-a aliba küm ter asoshi Sumi kin aser Ao kin nungibo Primary teacher meshimtsü/magitsü ta jembiba, Social Media nung ngua Sumi kin aser Ao kin nüburtem kanga sungmanger...!!! Aji oda, nübur madak yimsu asütsü nübur meyongnem agüja shimtetba (Elected Member) tatar kaji, nüburtemi 'Public Leader' ka ama kanga akümtsübur, saka pa ama aküm-ket nisung (Respected Person) kati kin karbo mejetteta bendanga beshiba ama sayua, ken o mekümdangi jembiba jagi, Sumi kin aser Ao kin ana nüburtem temulong kanga yirutsüogo. Iba ama mebilemdangi jembiba jagi lennir Dr.Yhome dak Naga nung kin ajunga küsa züngshiba aser Naga nung kin ajunga longjema ayutsü merangba yimsusur (Politician) ka masü, saka Naga nung kintem rongnung balala bendanga beshiba 'Tribalism' shisatsü aketba lennir ka...ta pai jembiba o jagi küli tejangja sayuogo. Atangji, pa ama sorkar nung tazünpur lennir kati, Naga nung kintem rongnung telemsa adoktsüsa, kin karbo balaka mejetteta bendanga s jembiba jagi... Tang yimsu tesudak sorkar tebilemba aser temulongjang nübur dang sayuogo.

Küm ana-asep ka sua ogo, Naga lima nung tang yimsu tesudak sorkar-i, Naga lima terenlok (Development) mapa atema District shia sen 'Sanction' lemsaba nung Kohima, Dimapur, Chumukedima District aser tanga tanungba District-tem nungpo sen aika lemsütsü, saka Mokochung District nungbo tanga District dang nungi kanga ajema lemsütsüba agi, Ao kin balaka mejetteta senzuka toktsüba (Step fatherly treatment) amai repringteta, Aor lokti-tentet balala nungi sorkar dang kanga mepelai ola adokba ajangshia aruogo. Ano küm ishika tejaklen tang aliba sorkar nung yimsusur tazünpur (Elected Member) kari, nenok Ao kin-bo lenla ajak nung agishia agiogo, terenlok mapa-a agishia agiogo aser sorkar tenzükba mapa nunga nenok teimba shilem agiogo, joko ojang dang suang...tangar kintem nem maangka (Chance) agüjang...ta jembiba-a angazüka aruogo. Aji oda, shitakba iba amaji jembiba lira, nübur madak yimsusuri kin karbo balaka tuteta meketmeseni jembiba jagi, Naga nung kin rongnung kin karbo balaka mejetteta bendanga beshiba (Tribalism) jakla sayur, aser iba ama jembiba jagi nübur mulongjang nung zübo keta yirutsür. Aser ano tang lennir Dr. Yhome-i Sumi kin aser Ao kin balaka mejetteta bendanga jembiba ngua nüburtem kanga aoksar...!!! Aji oda, sorkar tazünpur lennir-i iba ama o jembiba aser sorkar inyakyim nung tanak-temesung bendanga beshiba angudang, tang yimsu tesudak sorkar-i Ao kinbo Naga nung rongnung tera tajemzükba senso ka amai senzuka toktsür asü koda...??? ...ta kangasa nemjema bilemer.

Surabangla, School Education Department nung aruya-a aliba küm ter (10 years) tsüngda nungjibo Sumi kin aser Ao kin nungibo Primary teacher asütsü tetemsu (Qualified) liaka, meshimtsü/magitsü ta asübaji...Honourable Advisor Dr. Yhome pa kija tebilemba aser nukjidong asü (?) Mesura sorkar tebilemba aser nukjidong (?) Ibaji tejangja nübur nem metetdaksütsüla. Surabangla, School Education Department nung Primary teacher shimba yayim ya.... Mirit, Skill, Qualification nung ajemdaker shimtsü asü (?) Mesura kin shia (Tribe-wise) tesayur-tem züngdanga (Statistic) orr, koba kin nungi ishiba/tajemba lidir, item kin nungjagi dang shimtsü (?) Ibaji nübur nem tejangja metetdaksütsüla. Nagaland State ngur joko küm roker (60 years) dak tali sua aor, iba tetsüngda nungji sorkar balala melentepa yimsusua arur, saka koba sorkar mapang nunga, sorkar mapa nung tenzüktsü aniokba nung kin shia (Tribe-wise) züngdangtepa aoba (Statistic) aser koba kin nungi teimba sudir item kintemjibo magitsü/meshimtsü ta jembiba kodanga angazüka maru. Repranga arunung tang yimsu sua aliba sorkar-i yimsu sua arur külen nungi, asen Ao kin tang amai mapa kar-kar nungpo paitoktsü merangba repringteta arur. Anungji Aor Elected Member-tem, Politician-tem, Party Worker-tem aser lokti lennir ajaki iba ya kanga suoki yia bilemdangtsüla.

Aser joko tang nungibo School Education Department nung dang masü...Secretariat Office nungi tenzükter Department ajak nung liromedema sorkar tenzükter (Service-walla) ajunga Tribe-wise Statistic aotsüla, aser Gazzeted Post nungi alua Peon/Chowkidar tashi, züngdanga (Statistic) orr, koba kin (Tribe) nungi teimba lidir, item kin-jibo küm ter tashibo meshimtsü/magitsü ta telemtetba takhang ka agitsüla. School Education Department nung dang masü, saka Department ajak nung küsaji liromedema inyaksüla. Ajiser, aruya-a aliba küm ter (10 years) tsüngda nung Sumi kin aser Ao kin nungibo Primary teacher magitsü/meshimtsü ta asübaji...Sorkar tebilemba aser nukjidong sura, Sumi aser Ao kin nungi tang sorkar nung dena aliba 'Elected Member'-tem atema-a iba onukji kanga suoki yia shisadangtsü ka lir...ta bilemer. Anungji yimsusurtemi kin o kin tsüngda telemsa madoktsüsa ken o kanga kümdanga jembitsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

China nung sorkari Apple App Store nung Pray.com agienogo

February 25, 2024: China nung Khristantem atema kanga tongtumbang digital platform- Pray.com, Apple App Store nungi agienadokogo; iba ya ajanga China nung Communist sorkari maneni Khristantem anema inyakba kuli jangjar.

App store nungi Pray.com agienadokba ajanga Khristantemi National Day of Prayer livestream densema tongtumbang sentong aika mepreprangtetsü. Pray.com nung osangtajung kentener Chris Tomlin aser sayutsünger Franklin Graham nung indang sentong densema Khristantem atema tongtumbang sentong aika lemsateper.

2016 kum Pray.com indang mission tenzükba mapang nungi parnoki alima tesem ajaklen Khristantem tamang jenjang aintsü atema nendaka inyaka arudar.

Tang alima nung iba app amshir million 16 dak tema lir; iba app nung anogo shia sarasadem aser Laishiba nung aliba otsütem densema tanela dak sendakba resource aika agütsür.

Pray.com co-founder, Michael Lynn-i, "Pray.com tenzükba sülen onoki China den-a tesendaktep junga yanglua liasü. China Tir Xi-i kum shia Laishiba million 150 menüngtsü temelaba agüja liasü aser (taoba mapang US Tir) Tir Trump-ia China nung Laishiba atema saru magitsü atema inyaka liasü," ta metetdaksü.

China nung communist sorkari iba app anentsüyonga Pray.com-i tanga lenmang ajanga China nung Khristantem atema maneni inyaksü lenmang bushidar. Iba dak sendakba nung taküm May ita nung Washington nung agitsü aliba National Day of Prayer sentong nung adentsü atema CEO, Steve Gatena China Tir Xi Jinping-a jaokogo.

Osangbener den jembidang Apple-i, onoki linük balala nung lateta aliba ozüngtem benschitsüsa akümer, ta metetdaksü.

China nung tamangba yimsü dak sendakba app tem app stores nung züngoktsü atema ketdangsertem dang nungi temelaba agitsüsa akümer. China dak alaka Pray.com app ya tanga store ajak nungi download sütettsü.

2022 kum China-i tamangba yimsü teloktem dang, internet nung yimsü dak sendakba sentong balala lemsateptsü atema internet religious information service license meshitsü metetdakja liasü. Bitter Winter densema meimchir temeden atema inyakba aser Khristan

melungtet telok aikati sorkar tetuyubaji aija liasü.

Pray.com co-founder, Matthew Potter-i item tetsükdakba paidoktsü atema inyakba maparen balala lemsatep. Pai taoba mapang US Tir, Donald Trump den-a iba tebilemtsü lemsateptsü, ta metetdaksüogo.

"Alima nung Khristantem sendaktepa alitsü aser maneni nungitpepa alitsü atema onoki item tetsükdaksü koktetsü atema inyaksü," ta Potter-i metetdaksü.

Tamalen-a China-i Bible apps aser Christian WeChat accounts shibangja liasü.

2021 kum Chinese Christian Fellowship of Righteousness nungi putir Francis Liu-i, joko China nung "Gospel League" aser "Life Quarterly," densema Christian WeChat accounts kar shibangtsüogo, ta metetdakja liasü.

China nung App Store nungi Bible apps agienogo aser online ajanga Laishiba alizüktsü mangur, ta International Christian Concern (ICC)-i metetdakja liasü.

China nung sorkari melaba Arogotemji Three-Self Churches dang lir. Tang China nung sorkari melaba yimsü telok pongu dang lir aser itemji- Buddhist Association of China, Chinese Taoist Association, Islamic Association of China, Protestant Three-Self Patriotic Movement aser Chinese Patriotic Catholic Association lir. Item telok dak alia tanga yimsü organization

bo sorkari mita repranger aser nokdang.

2018 kum China sorkari online bookstores nung Laishiba ayokba nokdanga liasü. Sorkari "China's Policies and Practices on Protecting Freedom of Religious Belief" document sangdongba sülen online ajanga Laishiba ayokba nokdang.

2021 kum China nung Communist sorkar tetuyuba nung ajemdaker Apple-i tamangba yimsü ana indang Apps agien. Apple-i China nung Muslim nung Quran app- Quran Majeed aser Khristantem indang Bible app- Olive Tree agiena liasü.

Iba mapang nungji Google Play Store nung Quran Majeed app ji million 5 dak tema download sür liasü aser Olive Tree app-a million 1 dak tema download sür liasü.

BBC den jembidang Apple-i ashiba agi, China ketdangsertemi parnok dang, item apps ajanga ozüng alema inyaker aser ozüng alema tamangba yimsü dak sendakba osang proker ta shia item apps agientsü atema tuyua liasü.

Iba jakdang 2021 kum May ita nunga Communist sorkari linük nung Bible apps balala aser WeChat Christian public accounts aika shibangja liasü.

2019 kum nunga China sorkari WeDevote Chinese Bible app anenja liasü, kechiyong iba app ya million 10 ben dak tema download sür liasü. Iba dak alia YouVersion ama American Bible apps-a Chinese app store nung mangur.

ANOGO ABEN TSÜNGREM DEN

Temenenji ozüng raksaba

Shibaisa temenen menar, pai ano ozüng raksar:

aser temenenji ozüng raksaba lir.

1 Yohan 3:4

Tanelaren shidak meshidak tasadangba ka makai taküm alitsübaji lendong lir. Tsüngrem Oji tasadangbaji lir. Temang ozüng amaji tanela ozüngji na sottsüba masü, na kumzüktsüba lir. Nai ne temeten amshia electricity den tokteptsü akok, saka yamaji inyak nung ne dangi tasüba bener arutsü. Yamaji nai Tsüngrem ozüngtemji meraksatsüla, item jagi ne taküm raksatsü. Tsüngremi jakla aser tanelaren ozüng yanglu saka asenoki asen timtem yanglur. Sobalibai Tsüngrem ozüngtem malemer. Tensa tiai itemji majenbanger Tsüngrem ozüngji tatem makai alir aser item jagi na tasü nungi kumzüktsü nai anidakra.

Tsüngremer ozüngtemi na satema mesüdaksüi sotetter aser alener ta nai bilemtsü akok. Yamaji masü. Tsüngremer Oi na tasü nungi kumzükter (Rom 6:23). Tatishitsü agi, kodang Tsüngremi ne dang nüktapangta tesü ta ashir, Pai na satiba tesendaktep nung jangratema tepela ajunga agidaktsüner. Iba dang tali nai item ozüngtem raksara nübuttsü/ ne kinüngbo, tanurtem, ne kinungertem aser ner kibong arogo dangi tekolak menütsü arutsü ta Pai metet. Ne taküm asoshi Tsüngrem ozüngtem koda tongtipang! Itemji makara Tsüngremi na asoshi tepela rizünga yua alibaji nai mangutsü. Ne taküm amendaktsü Satani Tsüngrem ozüngtemji masü tanga jenjang ka shimer. Nai ne kiyonger, mesüra lokti ajanga ne takümji asadagra, nai ozüng raksaba nung ne taküm amendaker aser ozüng raksabaji temenen lir.

ABAM Sunday School subject orientation ayongzüka agiogo



Dimapur, February 24 (TYO): ABAM Sunday School Ministry Subject Orientation "Kü Sanchanutem Mesüang" Yohan 21:15 omen nung ajemdaker February 23 & 24, 2024 anogotem nung Chümoukedima Ao Baptist Arogo nung ABAM Zone 8 & 9 kanga takok ngua agiogo, ta ABAM Executive Secretary, Rev. Dr. Mar Pongener-i sangdong ka ajanga

metetdaksü. Ajak agi Arogo 28 nungi Asso. Pastor Christian Education temi anir Sunday School tesayur 267 arua iba sentong nung denogo.

Tongti O jembirtemji Mrs. Narola Walling, Asso. Professor, Discipleship Bible College, Mr. Sukum Aier, Program Coordinator at GLF & Counsellor at IRCA & SCWS, aser Dr. Moanungsang

Tzüdir, Secretary, Education & Literature, ABAM nung nungi aser Tanü Tanur Tia aser Lipükum nung Tanur onüktem jembia liasü.

Mrs. Abenla Aier Coordinator, Children Ministry, ABAM aser Mr. Imsentiba Coordinator, Sunday School Ministry, ABAM, ajanga Sunday School lesson Grade 1-15 nungi sayua liasü.

ABAM ajanga Chümoukedima Ao Baptist Arogo dang iba sentong achaayangba den chiyungtsü aser tanendak ajak anepalutsüba asoshi pelaba lemsateper, ta sangdong nung shia lir.

Tsüngremi Arogotem nung Sunday School tesayurtem asen tanurtem tim lenmang nung anitsü asoshi shisatsü aser anema aliba mojangma.

AO OSHI ANGAZÜKDAK:
TANÜ ANGAZÜKTSÜBA OJANG



Songjen

(n) ajak (entire, whole)

* Yimer songjen alui ao.

Songkongtemtsü

(n) kecha mesütetba nisung, tagidak maka (useless)

* Sopangba ya olabo tulu saka songkongtemtsü dang lir.

OLONG PAITEP # 6709

1		2				3		4		5
				6						
		7		8						
9						10			11	12
				13		14	15			
16						17			18	
				19		20				
21		22								23
24										

TIPILEN

- 1. Saku - (4)
- 6. Songjen - (7)
- 7. Mall/Tazung - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzungludenkülemi tsüker - (3)
- 17. Aso tila - (6)
- 20. Tashi maküm - (4)
- 24. Tenüng kasa jatepba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tubeba - (3)
- 5. Anüngdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. ___ tatsü - (3)
- 12. Tebur kidong aser zünga kasa tsüngda jatepba - (4)
- 14. Pela agizükba tapu ka - (5)
- 15. Tenüng atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 6708 TELANGZÜBA

TIPILEN :

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso,

LANGTSÜNGLEN :

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüngdak, 10. Yongya,
- 11. Kongro, 13. Ora, 14. Ata.

NAI-A YA METETTER MA



Prime Minister Narendra Modi-i February 25, 2024 nü India nung cable-stayed bridge talangtiba lapoktsüogo. Gujarat kübok Dwarka nung PM Modi-i Okha aser Beyt Dwarka island sendaktepba 'Sudarshan Setu' lapoktsü. October 2017 nung pai kilometre 2.3 talang apu yanglutsü atema lung azüngja liasü aser iba apu ya Rs 979 crore endoka yangluogo. Sudarshan Setu nung footpath ka lir aser iba nung Bhagavad Gita tekongtem aser Lord Krishna noksatem enoka lir.

Manipur CM-i saisaponger 133 nem sorkar mapa agütsür



Imphal, February 25, 2024

(Agencies): India aser Manipur atema konang bentsür arur saisaponger 133 nem state sorkari mapa agütsütsü.

Deobarnü Khuman Lampak Sports Complex, Imphal nung Players' Day (Sannaroisingi Numit) observation 2024 amongdang Manipur Chief Minister N Biren Singh-i iba osang metetdaksü.

State sorkari Naorem Roshibina Devi (Female Wushu player from Manipur) nem Deputy Superintendent of Police (DSP) agütsür ta Chief Minister-i ashi.

January 9, 2024 nü Rashtrapati Bhavan nung India President Droupadi Murmu-i Naorem Roshibina Devi nem Arjuna Award 2023 agütsüogo.

Naorem-i saisapongbaren nung kanga merangba aser Olympic games nung medal ka

angutsü asoshi merangba mapang ka nung state sorkari la nem mapa agütsür.

Naorem Roshibina Devi-i 19th Asian Games Hangzhou, China nung Silver Medal, World Wushu Championship in Texas, United States of America nung Silver Medal aser Moscow Wushu Stars Championship in Moscow, Russia nung Gold Medal nguteta liasü.

Gujarat nung 36th National Games aser Goa nung 37th National Games mapang takok angur saisaponger 132 nem sorkar mapa agütsütsü ta CM Biren-isa metetdaksüogo.

Iba sentong nungsa Chief Minister-i national aser international competitions nung takok angur nem senpet agütsüba den tesüba mapang saisapongertemi Manipur sporting legacy ajungketba nung shilem agiba atema tetushi

agütsü. Tanü CM Biren-isa Khuman Lampak Sports Complex nung Maipak Sports Digital Experience Centre (MMSDC) lapoktsü.

Khuman Lampak Sports Complex ya Samsung Data System India Pvt Ltd aser Abhitech IT Solutions Pvt Ltd den Memorandum of Understanding (MoU) ka ajanga yangluba lir.

Iba centre ajanga saisapongertemi state nungi takok anguba asayartem osang aser sorkar scheme balala metettsü.

MMSDC ya Manipuri bodybuilder Nongthombam Maipak Singh nüngtem nung aja aser pai 1970 nung Mr India title aser 1971 Mr Universe competition nung 10th position takok angu, ta CM Biren-i metetdaksü.

Vice President Dhankhar-i tanü Mizoram Assembly nung o jembitsü

Aizawl, February 25, 2024

(Agencies): Vice President Jagdeep Dhankhar-i Hombarnü Mizoram Assembly budget session nung o jembitsü.

Jagdeep Dhankhar-i Mizoram nung convocation nung adenba sülen Hombar anüngdang 12.45 ako meta assembly nung o jembitsü ta State Assembly Commissioner & Secretary Vanlalthantlingi-i ashi.

Dhankhar-i asüng Mizoram semdangtsü aser MZU convocation den assembly nung

adenba sülen Delhi-i meyipa aotsü.

M Venkaiah Naidu sülen Mizoram state assembly nung o jembir tanabuba Vice President ji pa asütsü.

Taoba chief minister Zoramthanga-i aniba Mizo National Front (MNF) sorkar alidang March 10, 2022 nü Naidu-i Mizoram Assembly budget session nung jembia liasü.

Tang tashi nung President asemi Mizoram Assembly nung o jembigo. Parnokji Dr APJ

Abdul Kalam (September 2005), Ram Nath Kovind (November 2017) aser Droupadi Murmu (November 2022) lir.

Hombarnep 10:30 ako nungi assembly session tenzüksü aser 10.30 ako nungi 11.30 ako tashi Question Hour alitsü ta State Assembly Commissioner & Secretary Vanlalthantlingi-i ashi.

Asüng Taxation Minister Dr Vanlalthlana-i 'The Mizoram Goods and Services Tax (Amendment) Bill, 2024' benoktsü ta laisa ashi.

Arunachal nung Congress aser NPP MLA ananai BJP nung aden



Guwahati, February 25, 2024

(Agencies): Lok Sabha elections agitsü jakdang

Arunachal Pradesh nung MLA kari Bharatiya Janata Party (BJP) nung denogo.

BJP nung adenertemji Congress MLA 2 aser National People's Party (NPP) MLA 2 lir ta osang angazüker.

Congress nungi Ninong Ering aser Wanglin Lowangdong aser NPP nungi Mutchu Mithi aser Gokar Basar nungeri BJP nung aden.

Iba sentong nung Chief Minister Pema Khandu aser state BJP president Biyuram Wahgem na aden.

Iba ya Congress atema tetsükdaksü tulu ka saka BJP atemabo tajangzük lir kechiyong taküm Lok Sabha aser Arunachal Pradesh Assembly elections külemi agitsü sentong lir.

South Carolina nung Trump-i ayong-ayonga Haley akok



Columbia, Tsüklai/February 25 (Agencies): South Carolina nung Nikki Haley madak tetsüngta tulu agi takok anguba sülen Donald Trump ya Republican telok nungi US tir asoshi tokteptsü jenjang ka anasai ogo.

Taoba tiri Haley'er home state nung takok anguba ya points 20 agi timba liasü aser ibai pa asoshi pezüben buba atonga takok anguba alitsü.

Trump-i iba state nung takok anguba indang jembidang Haley tenung metetshi, shibai maneni tokteptsü nangzüka lir. Pai November ita general election dak rangloker jembida liasü.

"Asenoki Joe Biden indang tenük nung indang-indanga rangloktsü. Pai asen linük samatsür aser asenoki pa dang 'Joe ainshiang, na mapa nungi anentsüogo' ta ashitsü," ta Honibar aonung US media ajanga pai takok nguogo ta sangdonger minute ishika tsüngta pai pa bhukumertem dang ashi.

Honibarnü result sülen

Trump-i par party lungjemba atema tenügsang agüja "Tang ama tanüla kodanga meliasü. Ni Republican Party tang ama lungjemba kodanga mongudang," ta ashi.

South Carolina nung kümükü ana governor inyakla Haley-i jembidang Trump nem tenügsang agüja liasü.

Lai maneni tokteptsü nangzüka, ajisüaka lai vote shilem 40 shi ngutetba ya telok tilabo masü ta ashi.

"Asen Republican primaries nung aikati temelen nungdaker ta ashir aser ibai kü kisüng indang mangdang masü," ta lai ashi.

"Ni iba rara maneni raratsü, kechiaser America nunger timbai Donald Trump aser Joe Biden magizüker," ta lai ashi.

Lai Super Tuesday - March 5 - tashi tokteptsü ashi. Iba anogo states 16 nungi voters temi vote agütsüsü.

"Ni ya jembiba ama inyakba tetsür ka lir. Asüng asenok Michigan-i aotsü aser asenok Super Tuesday states-i aotsü,"

ta taoba mapang UN ambassador inyaka alilai ashi.

Haley-i maneni tokteptsü merangba ya nungdak maka ta Trump teloki Honibarnü sangdong ka nung ashi aser lai telemtetba shidak magiteti mangpor aser la asangsang nung malir ta ashi.

Taoba US tir yagi taruba ita tashinung nomination atema delegates peria bendentetsü ta par teloki takzüteter.

Haley asoshi tejakdang lenmang tejanga ka mali - la den tokteper delegates timba lir aser tanungba states tem nunga lai tajemba angutsü sayur.

Ajisüaka Haley campaign ya tang tashi nokdaka lir, aser ibai talisa tenla agütsür tajung aliba ajanga lir. Lai tamakok ajuruaka la asoshi senotsü tenla agütsüba manener.

January ita kisüng nung Haley-i sen million \$16.5 bendentet ta campaign ketdangsürtemi ashir. Ibaji tang tashinung lai ita ka nung bendentetba timtiba alitsü aser Trump dang kanga agi timba.

US aser UK nati Yemen nung Houthi pur tamendakdak amak

Washington, Tsüklai/February 25 (Agencies): Yemen nung amendaker aliba Houthi teloki Israel-i Gaza amakba anema Temerem tzüyim nung rongtem tali amakba mapang ka nung United States aser United Kingdom nati Yemen nung Houthi telok tamendakdak kar makogo, ta ketdangsürtemi metetdaksü.

US aser UK nati Honibarnü külem sangdong ka ajanga ashiba agi, parnoki Yemen kübok tesem ti nung Houthi pur tamendakdak 18 tashi makogo, kong ali telung nung prangbong injang aser missile tem rizünga ayuba tesem, air defence systems, radar aser helicopter ka amakba densema lir.

Honibarnü tesem balala amakba sülen January 12 nü nungi tenzüka tang agi pezübenbuba US aser UK military senteper Houthi pur makogo.

Külemi senteper jenjang agiba dak alia US-i anogoshia amai Houthi pur indang target tem maka arudar, kong parnoki shishilemba dang amshiba rongtem aser tanga navy indang rongtem dak

khaloktsüba missile, rocket aser drone tem densema lir.

Tesem balala makaka iba ajanga Houthi puri tesem balala aser rongtem amakba menokdangteti arudar, koba ajanga alima ajunga nung rong ajanga shishilemba nung tetsükdaksü adoker lir.

US Defense Secretary Lloyd Austin-i ashiba agi, Iran-i teyari agütsüba Houthi telok tashi meiti kümduksütsü atema parnoki jenjang agia arudar.

"Houthi puri Middle East nung rongsenketzüng, tzümpung raksatsüba aser Yemen aser tanga linüktemi teyari yokba nung tetsükdaksü adoktsüsüsa ozüng alema inyaksangshiba manenra onoki maneni tenjang tapet agitsü aser iba khuret Houthi puri abentsü ta maneni metetdaksütsü," ta pai ashi.

Item tesem balala amakba ya Australia, Bahrain, Canada, Denmark, Netherlands aser New Zealand nungeria teyari agüja liasü.

Kasa mapang nung Houthi telok nungi otongdar Yahya Saree-i ashiba agi, American aser British nati parnok amakba atema telangzüba

agüja Temerem tzüyim aser Arab Seas nung parnok anemertem anema jenjang tasashiba agia American-British den tokteptsü Houthi puri tenangzüka agütsüogo.

Houthi puri Palestine nungertem maneni pusemsü aser Gaza nung rara manen tashi aser iba tesem nung Palestine nungertem sabanger aliba magintsü tashi military operation tem maneni benoka inyaksü, ta pai shisem.

Associated Press news agency sangdong ka ajanga ashiba agi, Houthi puri Temerem tzüyim aser Gulf of Aden nung November 19 nü nungi tenzüka shishilemba dang amshiba aser military indang rong tem 57 ben makogo. Aser tawa asendenshir rongtem taliba maka arudar.

Ano tanga Houthi otongdar kati ashiba agi, parnoki Honibarnü US wako songer aliba chemical aser oil tanker MV Torm Thor makogo ta ashiba den, parnoki iba rong amaktsü atema naval missile tapet amshia liasü.

US Central Command-ia iba rong amakba jangjatsüogo aser ashiba agi, sepaitemi

Israel-Hamas tsüngta yimjung bushir, Gaza nung 92 tepset

Gaza City, Tsüklai/February 25 (Agencies): Rara anena atatsü asoshi lenba-lenre bushia jembitsü asoshi Israel indang itdangter tekolakba jembishinü nung adenba sülen Israel-i tang tesüsa Gaza Strip amakba nung Palestine nunger aika asü ta iba litsü indang health ministry ajanga Honibarnü ashi.

Gaza nung rara sülen inyaksü atema sentong ka Israel Ato Kilonser Benjamin Netanyahu-i sayaba United States-i aitsü, Hamas aser Israel künok aliba West Bank nung Palestinian Authority-i magizükba sülen iba jembishinü ya arur.

Gaza nung civilian tem chiyongtsü agi kanga anünga akumtsü asoshi tetsübo tali akumba mapang iba jembishinü ya alir.

Hamas teloki Honibarnü ashiba agi, Israel sepaitemi tesüiba ghonda 24 tsüngta Deir al-Balah, Khan Yunis aser Rafah densema Gaza nung yimti aika nung aliba civilian ki nung 70 ben dak tema amak. Nisung 92 shi tepsetogo ta health ministry ajanga ashi.

Israel indang mitkaria tanks, close-range fire aser tayimtsü amshia Khan Yunis anüolen tsütsü operation tesashiba agir ta shia liasü.

Sepaitemi iba tesem nung senior military intelligence operative ka indang ki meita ao aser longpok ka raksatsü, ta mitkari sangdong nung ashi.

2007 nungi Gaza nung yimsü süa aruba Palestinian

movement, Hamas-i ashiba agi Gaza north tsütsü Zeitun district nung rara tesashiba akumer.

Israel-i October 7 nungi tashi ajak amshia makyonga arudang Gaza nung nisung 29,606 shi tepsetogo aser item ya timba tetsür aser tanurtem lir, ta Gaza indang health ministry ajanga Honibarnü sangdong nung ashi.

Ita pezü dak tali rara aruba mapang Netanyahu-i rara sülen Gaza atema sentongka Brehostibarnü saya, kong rara sülena Gaza tesem ajunga nung kiralongrar shia aruba nokangtsü asoshi Israel sepaitem dak tashi ajak alitsü ta shia liasü.

Ajisüaka iba senong nung kodanga takok mangutsü, ta Hamas ketdangsür Osama Hamdan-i ashi.

Iba sentong ya United States-ia aitsü. "Palestinian Authority asendenshir ibaji ajanga Palestine nüburtem ola aser vote alitsüla, shirnoki West Bank nung shilem kar ketdang asür," ta National Security Council odongtar John Kirby-i ashi.

Pua alir tanungba chiohtsü asoshi asendenshir jembishinütsü atema Mossad intelligence agency tekolakba David Barnea-i anir Israel delegation ka Paris nung oa lir.

Form No.3 [See Regulation-15 (1)(a)]/16(3) DEBTS RECOVERY TRIBUNAL GUWAHATI Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati-781007 (Assam) Case No.: OA/287/2021 Summons under sub-section (4)of section 19 of the Act, read with sub-rule (2A) of rule 5of the Debt Recovery Tribunal (Procedure) Rules, 1993. To, Exh. No.: 4116 HDFC BANK VS M/S MOUNTAIN MUSIC To (1) VICTOR TSUZU BROTHER OF LATE MS NITUO TSUZU RESIDENT OF FLAT NO 3 AIKO BUILDING OPP TOWN HALL NAGARJIAN JUNCTION DIMAPUR NAGALAND 797112, DIMAPUR, NAGALAND 797112 (2) DEBORAH TSUZU BELL SISTER OF LATE MS NITUO TSUZU RESIDENT OF FLAT NO 3 AIKO BUILDING OPP TOWN HALL NAGARJIAN JUNCTION DIMAPUR NAGALAND 797112, DIMAPUR, NAGALAND 797112 (3) NIKOLO SISTER OF LATE MS NITUO, TSUZU RESIDENT OF FLAT NO 3 AIKO BUILDING OPP TOWN HALL NAGARJIAN JUNCTION DIMAPUR NAGALAND 797112, DIMAPUR, NAGALAND 797112 (4) BETHEL TSUZU SISTER OF LATE MS NITUO TSUZU RESIDENT OF FLAT NO 3 AIKO BUILDING OPP TOWN HALL NAGARJIAN JUNCTION DIMAPUR NAGALAND 797112, DIMAPUR, NAGALAND 797112 JAOKER OA/287/2021 ya Hon'ble Presiding Officer/ Registrar matsügdang 12/02/2024 nung züluoka liasü. Sentsüh sen 4165621.76/- (application den documents balala copy tem inoka lir) menoktsü atema Act, (OA) indang section 19(4) kübok iba Application atema Hon'ble Tribunal ajanga summons/notice agütsür. Act indang section 19 indang sub-section (4) nung aliba ama na defendants asünung item totuyuba ya agütsür:- (i) iba sangdong agütsür anogo 30 tsüngta pamoki meshizüka aliba anogo kechiba magütsüsüla; (ii) original application indang serial number 3A kübok applicant-i tejanga shia aliba ki o jen aser rongsen dak alaka danga ki o jen aser rongsen tejanga shitettsüla; (iii) ken o metembang tashi original application indang serial number 3A kübok shia aliba secured assets mesüra iba ama danga rongsen aser ki o jen mayoktsüla aser dangar nem magütsüsüla; (iv) Tribunal nungi temelaba magie original application indang serial number 3A kübok shia aliba rongsen tem mayoktsü, dangar nem khen atema mamshidaksütsü; (v) ordinary course of business nung secured assets mesüra danga assets aser ki o jen tem ayokba nungi aruba sen temitem rongsen mechi security interest aliba bank mesüra financial institutions temi amshiba account nung inoktsüla. Na tezüluba nung statement agütsüsü aser Presiding Officer matsügdang 05/04/2024 anepdang 10:30 ako nung arua nokdaksü totuyuba agütsür aser yamaji meinyakra na meliaka ken o jembitsü aser telemtetba agitsü. Iba 19/02/ 2024 anogo iba Tribunal tenung nung ni meyongnem aser seal agütsür.
--

Sd/- Registrar,
Debts Recovery Tribunal
GUWAHATI

Khelo India University Games tembangogo



Dimapur, Tsüklai/February 25 (TYO): Khelo India University Games wrestling games February 25 nü IG Stadium, Kohima nung tembangogo.

Asayamung shibangba sentong nung Angh L A Ganesa alakteta jaoker liasü. Tetsürtem 65 kg final asaya iba sentong agiba mapang asaya aser Angh-i takoker nem medal agüja liasü.

Tebur asaya nung Chandigarh University champion liasü aser tanabuba aser tasembuba jenjang nung Guru Kashi University aser Rani Chanamme University liasü.

Tetsür asaya Chandigarh University-i akok aser Lovely Professional University aser Guru Kashi University tanabuba aser tasembuba jenjang nung liasü.

Sentong nung Naga wrestling asaya Venuzo Dawhuo aser Kezhaseluo-o Pienyü nati asaya-a sayua

liasü.

Tatembangbuba anogo asaya result:

Freestyle seniors 61 kg

Gold- Ramkesh of CU
Silver- Aksh of SLBSRSU

Bronze- Anil Kumar of LNIFE

Freestyle senior 86kg

Gold- Sachin of CU
Silver- Pushpender Dalal of MDU

Bronze- Badal Vidhuri of CDLU

Freestyle seniors 125kg

Gold- Aman Rathi of GKU
Silver- Sudarshan Mahadev Kotkar of SPPU

Bronze- Sakesh of SJJTU

Women's seniors 57 kg

Gold- Shilpa of BPSMV
Silver- Hansabenrathore of LPU

Bronze- Manju of GKU

Women's senior 65kg

Gold- Komal of CRSU
Silver- Antim of CU

Bronze- Diksha Malik of GKU

Bronze- Freedomyadav of LPU

Women's senior 68 kg

Gold- Sumit Kumari of IGU
Silver- Tamanna of MDU

Bronze - Shravani Dnyaneshwar Shelake of SU

Women's seniors 76kg
Gold- Reetika of CU
Silver- Sunena of MDU

Bronze- Shikha Dabas of GKU

Greco-Roman seniors 55 kg
Gold- Sanjeev of LPU
Silver- Raju Borasi of DAV

Bronze- Dinesh Yadav of BHU

Greco-Roman 87kg senior category wrestling.
Gold- Yudhaveer of OPJSU
Silver- Aditya A Bedyale of VSKU

Bronze- Deepak Singh of LNIFE

Greco-Roman senior 130kg
Gold- Sagar of DKNMU
Silver- Linkan Singh Yadav of DRMLAU

Bronze- Wadajkr Deepak Balaji of SRTMU.

Iba asayamung nung University 72 nungi asayar 232, technical official 25 aser support staff 55-i shilem agia liasü.

Gold - Sumit Kumari of IGU
Silver- Tamanna of MDU
Bronze - Shravani Dnyaneshwar Shelake of SU

Women's seniors 76kg
Gold- Reetika of CU
Silver- Sunena of MDU

Bronze- Shikha Dabas of GKU

Greco-Roman seniors 55 kg
Gold- Sanjeev of LPU
Silver- Raju Borasi of DAV

Bronze- Dinesh Yadav of BHU

Greco-Roman 87kg senior category wrestling.
Gold- Yudhaveer of OPJSU
Silver- Aditya A Bedyale of VSKU

Bronze- Deepak Singh of LNIFE

Greco-Roman senior 130kg
Gold- Sagar of DKNMU
Silver- Linkan Singh Yadav of DRMLAU

Bronze- Wadajkr Deepak Balaji of SRTMU.

Iba asayamung nung University 72 nungi asayar 232, technical official 25 aser support staff 55-i shilem agia liasü.

Para Badminton World Championships: Yathiraj, Bhagat & Nagar nungeri gold angu

Tsüklai/February 25, 2024 (Agencies): India nunger asayar Suhas Yathiraj, Pramod Bhagat aser Krishna Nagar nungeri Deobarnü Para Badminton World Championship nung tebur SL4, SL3 aser SH6 kija asaya nung gold medal nguogo.

World No 3 asayar Yathiraj, shiba Paralymic silver medalist ka lir pai SL4 final (standing/lower limb impairment/minor) nung Indonesia nunger asayar Fredy Setiawan 21-18 21-18 agi koka tang mezüngbuba World Championship nung gold medal nguogo.

Arishi küm 40 tain Yathiraj ya Karntaka nungi lir aser pa ya Uttar Pradesh cadre nungi 2007 batch IAS officer ka lir. Pa tang UP sorkar kübok secretary aser director general of Youth Welfare & Prantiya Rakshak Dal lir.

Tokyo Paralymic gold

medallist Bhagat, shibai China nung Para Asian Games nung gold ka aser bronze medal ana ngua liasü pai SL3 (standing/lower limb impairment/severe) final nung England nunger asayar Daniel Bethell 14-21 21-15 21-14 agi kokogo.

Bhagat-i 2015 küm Stoke Mandeville nung aser 2019 küm Basel nunga gold medal nguogo aser iba asayamung nung tang agi gold medal tasembuba nguogo. Paisa, 2022 Tokyo aser 2009 Seoul nunga gold medal nguogo.

Gold medal anguba dak alia arishi küm 35 tain asaya yagi Sukant Kadam aser Manisha Ramadass na den tebur tarep asaya aser tarep temeyoktep asaya nunga bronze medal nguogo. Medal asem anguba sülen pai tang tashi nung medal 14 ngua lir, kong gold 6, silver 3 aser bronze medal 5 densema lir.

SH6 category (standing/short stature), Krishna Nagar, shiba Paralympic nung gold medal angur ka lir, pai China nunger asayar Lin Naili 22-20 22-20 agi koka liasü.

Kasa asayamung tetsür SU5 (standing/upper limb impairment) kija asaya nung Manisha Ramadass-i final nung China tsür Yang Qiu Xia makokba sülen silver medal nguogo.

Tebur tarep asayar Chirag Baretha o Raj Kumar na aser tetsür tarep asayar Rachana Shaileshkumar aser Nithya Sre Sumathy Sivan nung silver medal nguogo.

Tetsür tarep asaya nung (SL3-SU5) Manasi Joshi aser Thulasimathi Murugesan nati Indonesia tsür Leani Ratri Oktilla aser Khalimatus Sadiyah na 20-22 17-21 agi mekoki silver medal dang angu.

Nagal nem Dubai Championship main draw atema wildcard agütsü

Dubai, Tsüklai/February 25 (Agencies): India nunger rongnungi nungtugu tennis asayar Sumit Nagal nem Dubai Championship main draw atema wildcard ka agütsüogo.

Dubai Championship ya ATP 500 event ka lir.

Asayamung atema qualifier Honibarnü nungi tenzükogo aser main draw asayatem Hombarnü nungi tenzüksü.

Iba asayamung nung Nagal mezüngbuba asaya Italy nunger asayar Lorenzo Sonego den asayatsü, shiba tang world number 49 lir.

Arishi küm 26 tain India nunger asayar yagi taküm kanga junga asaya arudar. Pa taoba ita Australian Open main draw atema qualify süogo, kong pai mezüngbuba round nung Kazakhstan nunger asayar Alexander Bublik koka tanabuba round-i ia liasü.

Iba asaya akokba sülen Nagal ya 1989 küm sülen tang mezüngbuba India nunger

rongnungi Grand Slam ka nung seeded asayar ka akokba mezüngbuba asayar aküm.

Pai pa indang career nung taiba ita mezüngbuba jenjang 98buba tongteta liasü, ajisüaka taoba hopta Chennai Open kokaka pa jenjang 101-i asepzüka aluogo. Chennai Open ya-a ATP Challenger event ka lir.

Dubai Championship nung Russia nunger asayar Daniil Medvedev top seed asayar asütsü aser pa sülen külem Russia nunger Andrey Rublev, Poland nunger Hubert Hurkacz, Russia nungersa Karen Khachanov, France nunger Ugo Humbert aser Adrian Mannarino, Kazakhstan nunger Alexander Bublik aser Spain nunger Alejandro Davidovich Fokina nunger lir.

Iba asayamung atema wildcards agütsürtem rongnung France nunger Gael Monfils aser Jordan nunger Abdallah Shelbayh nata densema lir.

Jordan Thompson-i Los Cabos Open kokogo



Tsüklai/February 25, 2024 (Agencies): Australia nunger tennis asayar Jordan Thompson-i Honibarnü Los Cabos Open final nung Casper Ruud koka tang mezüngbuba ATP title ka benogo.

Thompson-i final asaya nung Casper Ruud 6-3, 7-6 (7/4) agi koka liasü.

Thompson shibai iba asayamung semifinal asaya nung top seed asayar Alexander Zverev kanga meranga asaya koka liasü, pai final nunga kanga junga asayateta fourth-seeded asayar Ruud madak takok nguogo.

Arishi küm 29 tain asayar shiba Hokolbarnü Zverev den ghonda asem sür minute 40 asaya liasü, pai Honibarnü final asaya nung pa belemba temaitsü kecha mesayu aser Norway nungi Grand Slam nung asemben tashi final tonga asayar aliba asayar ya koka liasü.

"Hopta tepeyong kanga jangradema asayaogo," ta Thompson-i ashi, shiba quarter-final nung Alex Michelsen den asayadang 6-0, 3-0 ta aliba

mapa match point asem tashi kümzüka asaya koka liasü.

Final asaya mezüngbuba set nung nung Thompson-i game trokbuba nung Ruud indang serve break asü aser iba sülen break point ana tashi kümzüka pa indang serve break mesüdaktsü asaya 6-3 agi koka liasü.

Tanabuba set nung pai kanga junga asaya Ruud indang serve ka break süa 5-3 agi tejakdang liasü.

Ajisüaka 5-4 ta aliba mapang asaya akoktsü atema serve asüba mapang Ruud 0-40 agi tejakdang aküm aser Thompson indang serve break süa 5-5 ta kasasa aküm.

Iba sülen tanabuba game ana ya asayar kati danga serve break mesüdaktsü asaya aser ibayongji tie-break asayatsüsa aküm.

Tie-break asayaba mapanga Thompson-i tajungba asaya tenzük aser 3-2 agi tejakdang aküm aser iba sülen pa 5-2 agi timba aküm.

Rudd-ia kanga meranga asaya 5-4 aküm, ajisüaka pai Thompson menokdangteti 7-4 agi asaya kokdaksü.

BILEMDANGANG

"Tetsü oshi mejembitetra pei maitzü samatsü."